

合
淝
相
國
壽
言

袁
昶
撰

中
華
書
局

叢書集成初編

香嚴尚書壽言（及其他一種）

中華書局出版發行

（北京王府井大街三十六號）

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一

統一書號：一七〇一八·一五一

合泥相國壽言

此據漸西村舍叢
刊本排印初編各
叢書僅有此本

合肥相國壽言

太子太傅光祿大夫文華殿大學士總督直隸等處地方一等肅毅伯欽差北洋大臣總理海軍大臣合肥相國七秩壽序

代

古今之運會。逾闢而逾新。不相襲者也。古今之事業。亦逾出而逾新。不相襲者也。歷觀前史。位至宰輔。而年躋耄耄。聲施爛然者。若漢之扶陽侯韋賢。東漢之太傅趙熹。司空伏恭。司徒魯恭。年至矣。而事業未能震爍。今古。至於北平侯張蒼。元魏中書令高允。唐之狄梁公。宋之文潞公。年皆期頤。或至百餘歲。其相業煒矣。而又未際運會昇平之世。美哉。猶有憾。洪惟我朝國祚。龐洪純固。康熙乾隆前後兩六十年。明良交慶。前史稀有。洪恩汪濊。壽考作人。高宗運際中天。奇齡邁五龍。民物康阜。御製詩有古稀再稀。又再稀之句。授受大典。既成嘉慶之初。宮中時憲書。猶稱乾隆六十四年。千笈讌開。中外臣工。躋上壽者多。至不可更僕數。前後宰執。時則有若諸城劉文清公。漳浦蔡文恭公。溧陽史文靖公。無錫嵇文恭公。吳縣潘文恭公。儀徵阮文達公。皆享耆耄之壽。鹿鳴重讌。瓊林再逢。此豈惟由行仁致然哉。蓋乃高宗錫類之仁。沐浴陽澤。以致此人瑞。史不一書也。扶輿卓犖之運。流澤日新。今其屬於我太傅。端揆合肥伯相乎。我傅相夫子。機神明斷。惻款篤誠。歷事四朝。而尤被特達。殊遇於同光之世。邇者。璇闈歸政。上法成憲。與乾嘉之際。後先輝映。聖上繼述。將紹隆於康乾。用是天題錫羨。褒美輔臣。爛若雲漢。鷹視煒奕。蓋我夫子以歲在壽

星之年。正月有五日。正屈七秩嵩辰矣。□□不文。竊惟論運會則今古不相襲。論事業則後出者逾新。昔儀徵阮公爲史官日。恭進高宗八旬萬壽宗經徵壽說。參驗六經以爲之詞。誠以執經之心。所以位育天地。黼黻日月者也。而慈緯之書。實爲經之輔翼。今相國夫子毓粹五緯之精。揮瓘七緯之略。功緯竹帛。思緯風雲。然則明師相所以得壽之徵。徵諸慈緯之精義。其可乎哉。謹案春秋緯漢含華曰。三公在天法三台。在地象五嶽。又元命苞云。文昌六星。左上將。右上相。夫子篤生濶霍。天柱之鄉。實爲南嶽。上應南宮。權衡中興。將相之任。以一身兼之。繫朝野喁喁之望。垂三十年。同氣之美。邁荀龍而轢賈虎。門族之盛。實爲國朝名臣所罕見。嶽降之精。上應三能。其在斯乎。同治中興。臨軒授鉞。夫子以承明侍從之臣。鷹揚海澨。誓師龜暴。奠定三吳。迴戈青徐。兗豫之間。指擣諸將。摧殄連寇。青犢五槍之羣。擒渠掃穴。山川清明。還我澄霽。削平二慝。功在方略。謹案尙書中候曰。太公望得玉璫。刻曰。姬受命。呂佐旌。受祕書兵鈴之法。審權履矩。應敵之詐。縱己之謀。我朝以木德王。比隆蒼姬。仙李蟠根。發軔柱史。遂總師干。儼續尙父。詩緯含神霧曰。刻之玉版。藏之金府。僉曰。宜哉。又以爲前代幅員。神州褊狹。我朝聲教所漸。疆宇之拓。亘古未有。師相歷督大州。管鑰北門。歷時最久。仁育義正。惠政尤多。拱衛翼戴之績。四裔瞻仰。尙書考靈曜曰。四游所極。謂之四表。又樂緯稽曜嘉云。四奄之樂。東株南任。西禁北昧。公兼通九譯。銜轡遠御。殊域之樂。貢之太常。公子伯行觀察。銜命殊域。使能專對。爲國宣力。質秉義方。不惟佐上內治。抑殫誠外禦矣。禮緯含文嘉曰。侯伯有大功。則賜之衣服以表其德。朱戶以明其別。納陛以安其體。彤弓與矢。俾得專征。師相屢拜欽

差大臣之命。海軍創立。梯附董成。公兩奉命。巡勞軍伍。海若效命。馬銜翹誠。先後疊頒異數。豐貂玉璫。黃馬褂。雙眼孔雀翎。以及御書。樞勝之賜。中使相銜。不絕於道。紫韁之錫。尤爲殊禮。公乃錮錮如畏。對揚厥命。納於大麓。燁張廟謀。其忠。憲勤勞有如此者。又案書緯云。歲星得度。五穀乃孳。春夏令民早作。秋冬令民早息。寅賓寅饌。義和職之。樂緯動聲儀云。召伯勞身苦體。舍於樹下而聽斷焉。故召南美之。甘棠之詩是也。師相之節制畿輔也。金穰水毀。時廛民瘼。年豐則示之以禮。歲歉則教之以儉。偶有偏災。振廩康濟。決比斷獄。煥若神明。今邵公之年。已開第八秩矣。再八十年。寅亮坐治。俾惠政屢書不一書。

國之福也。民之幸也。春秋緯云。智者循轍。長生久視。黃童白叟。人人祝之。爲福德之星。使物不疵癘。而年穀順成。咸曰宜哉。謹案易緯乾鑿度云。正月之卦。氣在泰。泰表載干。鄭君注云。干楯也。春秋緯云。自冬至四十五日。至立春。條風乃至。遂生萬物。公久總師干。遠猷益壯。覽揆之辰。卦氣值泰。又遇立春。條風煦物之象也。攝提貞於孟陬。夾捧帝席。景星出焉。此又中候之占也。文露漑。武露布。佐調鼎鼐。協致昌期。實叶熙朝。景星甘露。麟一角芝九莖之瑞。是庸爲侈言耶。又以前代武庫之名物。邊備之制度。諸史所列。詫爲鉅麗者。以方皇朝武功甲仗之盛。殆皆邇莠不足掩其陋矣。我師初典兵枋。卽奏請講求火器之利用。實開風氣之先。歷以使相督兩江湖廣直隸。廣設制器之局。預儲武庫。防亂未萌。頻年相度登萊金復之間。董治臺堡。襟帶山海。允設天險。近又碣石之北。粟末河之南。剏造四徹中繩之軌。凡茲建實。皆亘古未有之巨工。奕葉無窮之隱利。論語摘輔象曰。軒轅七輔。受金法者風后也。受準斥者力牧也。爰庀五材。爰治

五金。爰治九軌。爰平九涂。士皆用命。地不愛寶。公之規模闊遠矣。至於退食之暇。清晏之辰。誡經稽律。游思八法。懸針墜露。筆力奇偉。則又摘輔象所云。鐵撻三折。韋編三絕。漆書三泚之勤矣。

謹案孝經緯云。尊事三老。兄事五更。三老。知天地人之事者也。五更。知五行更代之事者也。皇帝典學精勤。將舉臨雍之典。國三老之上儀。公實當之。執爵而乞言。梯几而對命。太史氏書之。以爲璇宮錫无疆之祿。黼座褰股肱之嫩。上繼史蔡。劉穉諸公之盛。豈特爲士林之私慶哉。蓋乃與中天之寶運相發而彌光矣。於是衢祝之賓。皆曰。若是乎古今之事業。與古今之運會。愈闢而新。遼乎其不相襲也。然以觀吾師。泊乎若無預。沖乎若不足。功成而勿居。德成而不自名。穆穆綿綿。進道若退。洗心藏密。日以德業返身考鏡。以期夫日新又新也。書緯運期。授稱太公丹書曰。敬勝者吉。義勝者從。易乾鑿度云。繫既濟。未濟於下經之終者。所以明戒慎而維世道。蓋窺公之用心。若臨冰谷。若承賓祭。節性日邁。光輝內含。用以師貞。錫命上承天寵。然則師相。惠國誠民。其浩然直養之氣之所存。又豈區區蠡蕤之見所能測識者乎。凡所稱引。多皆緯中最純之辭。極知陋劣修辭之義。未必有當。敢薰沐拜手而爲之序。

合肥相國七表初度第二敘

南至於朱厓。北至於粟末河。西極於松維。東則表胸界日主祠爲之門。此古之幅員也。以眎今之幅員。則狹矣。黃支貢犀。越裳獻雉。識條支之巨菴。論大夏之胡柯。致犂軒之眩人。詫金母之戴勝。此古之重譯也。以方今之重譯。則局矣。衛國景武公之平東西突厥。贊皇文饒公之馴吐蕃平澤潞。以及倉兕之官。樓船之師。飛雲蓋海之製。此古之武備也。以較今之武備。則瑕矣。損益連弩。翕張彭排。刀定秦。劍區冶。家鶴膝而戶犀渠。此古之戎器也。以方今之戎器。則窳矣。勒浚稽。銘碣石。碑韓陵。頌浯溪。譜樂職之三章。建營平之十策。此古之文事也。以較今之文事。則陋矣。拯溺由道情。龜暴資神理。陶桓公建江夏之績。服威信者百城。趙閔道濟越州之菑。活蒼黔者萬戶。此古之治行也。以方今之治行。則庠矣。我夫子太傅首揆合肥公之歷仕也。翼景運。垂洪暉。興文儒。蒐軍實。績之煙閣。冊於麟臺。圖在丹青。勒諸金石。朝野喁喁。華裔交仰。非上下五千年。縱橫九萬里。不足以語師相之壽。是豈小儒詹詹蟲篆之筆。所能形容其萬一哉。我夫子秉灑嶽之精。應昂宿之質。少壯承累葉積德深仁義方之教。承明金馬侍從著作之庭。吐納風雲。黼黻河漢。咸豐中葉。有震且業。兩宮懿聖。邁和熹而轡元祐。穆廟中興。侔周成而炳殷宗。特拔公於元老戎幄之中。遂舉義旗。電驅彗掃。奠定三吳。耀師外海。陸轡水慄。布令甲。蘇疲甿。淮淝勁兵名天下。自公始。而泰西武士亦帖耳用命。爭効爪牙。撫吳之政。奏滅四府浮糧。以數十萬石計。民困大甦。建儒學。鐫經籍。擢秀

孝之甲乙。還山川之清明。識者歎爲荆峴湯公後一人而已。遂移節兩江。督湖廣。參知綸扉。頻拜異數。分茅列爵。酬庸五等。以中原逋寇之不靖。梯附敗績。上相紆籌。詔移勁旅。指搃諸將。規畫四路。雲屯雷厲。馳驅於冀。竟青徐揚豫之郊。遂奏膚功。蕩平醜孽。彤弓朱履之錫。詔指相銜。天子以公股肱重臣。鈐鑰三輔。眞拜爰立。物望具瞻。旋首枚卜。朝野相慶。夾輔泰紫。倚爲金城砥柱之重。垂三十年。師相經綸夷險。百廢具舉。屏衛陪京。銜璽藩部。象胥雜沓。島索紛呶。質劑要約。文詞百車。夫子每談笑而折衝之。如大治之受羣金。莫不騰躍消融於鑪鞴之內。海軍初建。黃龍巨舳。赤雀牙檣。行陣之圖。機巧之器。亘古未有。前史肇建水師以來。未之聞也。親賢董統。皆倚夫子一手規畫。爲金湯不拔之基。遼海萬里。棚營軌路。中繩四徹。爰諏器師。羣疑旣渙。遠猷遂拓。夫師相在同治朝所建之豐功偉績。欽定兩方略載之。人人得而歌詠之矣。光緒改元以來。所規之訐謏碩畫。則廟社之利賴。鞏於不拔。制於无形。雖左右軍諮之選。有不能闕測其老成謀國之苦心者。大海蕩蕩。水所歸。高賢愉愉。民所懷。斯之謂乎。我朝國運之隆。亘古稀有。康熙乾隆前後兩六十年。高宗授受大典。執中上儀。聖齡耆耄。重華賜譙。御製詩有古稀再稀。又再稀之句。湛恩錫類。壽考作人。先後臣工。需預千安。御筵壽躋百歲者。不可勝數。至若宰輔三公之貴。先後若漳浦蔡文恭公。諸城劉文清公。無錫嵇文恭公。溧陽史文靖公。韓城王文端公。吳縣潘文恭公。儀徵阮文達公。皆鹿鳴再逢。瓊林重宴。

熙朝人瑞。史不絕書。雖諸公前後輝映。仕非一朝。然以徐偉長王澤之壽之說徵之。謂爲高宗錫福之聖。

澤涵泳於无涯。誰曰不宜。今夫子生際隆平。數中興佐命之功。實與曾文正左文襄諸老。若五星之編珠焉。璇閣歸政。上法乾嘉之際。聖壽无疆。萬方衢祝。將復開千交之議。奉皇太后鑾輿。時巡省方。近儀南巡。盛典之嫩。典學日隆。臨雍釋菜。於時夫子再宴鳴鹿。兩賦瓊林。爲國之三老。天子割牲執爵。授几乞言。使太史氏書之。其爲明良之慶。咸曰麻哉。夫世稱謝文靖作相。王公之度。大人之容。而寢處有山澤間儀。裴晉公放意機衡之外。收身矢石之間。優游台鼎。前史以爲美談。然以觀夫子。矧矧如畏。稽經詠律。終日乾乾。終夕惕惕。豫兮若冬涉川。猶兮若輯四鄰。進德修業。賓賢煦物。未嘗一日稍自暇逸。用以承天題錫。羨脊顧優渥之意。然則前史所云。功高百辟。心在一邱者。奚足道哉。奚足道哉。夫惟成周之邵公。職在分陟。年至百有八十歲。而孜孜以節性日邁爲程。衛武公翼戴王室。年百餘歲。猶作懿戒之詩。使矐誦之以自警。斯則王朝卿士之所以祝公。而尤夫子中之所存。德性純固。表裏粹然。所以長生久視之道。而豈彼服食導引修養引年者之所得同乎。敢薰沐拜手而爲之敘。